



續文選卷第十五

七



明平原湯紹祖公孟撰

晉問

柳宗元

吳子問於柳先生曰先生晉人也晉之故宜知之曰
然然則吾願聞之可乎曰可晉之故封太行掎之首
陽起之黃河迤之大陸靡之或巍而高或呀而淵景
霍汾澮以經其壩若化若遷鈎嬰蟬聯然後融為平
川而侯之都居大夫之邑建焉其高壯則騰突撐拒

聲岬鬱怒若熊羆之咆虎豹之嗥終古而不去攫秦
搏齊當者失據燕狄惴怯若卵就壓振振業業覩關
蹀戶惕若僕妾其按衍則平盈旋緣紆徐夷延若飛
戴之翔舞洄水之容與以稼則碩以植則茂以牧則
蕃以畜則庶而人用是富而邦以之阜其河則濬源
崑崙入於天淵出乎無門行乎無垠自匈奴而南以
介西鄙衝奔太華運肘東指混潰后土潰濁糜沸電
鼉詭怪于汨汨騰倒駭越委泊涯涘呀呷欲納摧
雜失墜其所盪激則連山參差廣野壞裂轟雷怒風
撼鷓於嶮崩石之所轉躍大木之所擢拔淵潭洞踏

者彌數千里若萬夫之斬伐而其軸轡之所負撞檣
之所御鱗川林壑隳雲遁雨瞬目而下者榛榛沄沄
百舍一赴若是何如吳子曰先生之言豐厚險固誠
晉之美矣然晉人之言表裏山河者備敗而已非以
爲榮觀顯大也吳起所謂在德不在險皆晉人之藉
也願聞其他

先生曰大鹵之金棠谿之工火化水淬器備以充爲
棘爲矛爲鍛爲鉤爲鏑爲鏃爲爲鏃出太白徵蓐收
召招搖伏蚩尤肅肅裊裊合衆靈而成之博者狹者
曲者直者歧者勁者長者短者攢之如星奮之如霆

續文選 卷十五
運之如縈浩浩奕奕淋淋滌滌熒熒的的若雪山水
谷之積觀者膽掉目出寒液當空發耀英精互繞晃
蕩洞射天氣盡白日規爲小鑠雲破霄跼墜飛鳥弓
人之弓函人之甲膠角百選犀兕七屬乃使跟超掖
夾之倫服而持之南瞰諸華北讐羣夷技擊節制聞
於天下是爲善師延目而望之固以拳拘喘汗免胄
肉袒進不敢降退不敢竄若是何如吳子曰夫兵之
用由德則吉由暴則凶是又不可爲美觀也先軫曰
師直爲壯曲爲老况徒以堅甲利刃之爲上哉

先生曰晉國多馬屈焉是產土寒氣勁崖坼谷裂草
木短縮鳥獸墜匿而馬蕃焉師師兢兢溶溶紘紘
鞞鞞或赤或黃或玄或蒼或醇或駘駘然而陰炳
然而陽若旌旃旂幟之煌煌乍進乍止乍伏乍起乍
奔乍躡若江漢之水疾風驅濤擊山盪壑雲沸而不
止羣飲源槁迴食野赭浴川蹙浪噴震播灑漬漬焉
若海神駕雪而來下觀其四散恂恂開合萬狀喜者
鵠厲怒者人搏決然全躍千里相角風驟霧鬣斷山
抉壑耳搖層雲腹捎衆木寂寥遠遊不久而復攬地
跳梁堅骨蘭筋交頸互齧鬪目相馴聚洩更虛昂首
張斷其小者則連牽繳繞仰乳俯齧蟻雜螻集啾啾

漶漶旅走叢立其材之可者收斂攻教掉手飛糜指
毛命物百步就羈牽以苟息御以王良超以范鞅軒
以欒鍼以佃以戎獸獲敵摧若是何如吳子曰恃險
與馬者子不聞乎故曰冀之北土馬之所生是不一
姓請置此而新其說

先生曰晉之北山有異材梓匠工師之爲宮室求大
木者天下皆歸焉仲冬旣至寒氣凝成外澗內貞瀟
液不行乃堅乃良萬工舉斧以入必求諸巖崖之欺
傾礪壑之紆縈凌巘岼之杪顛漱泉源之淦滄根絞
怪石不土而植千尋百圍與石同色羅列而伐者頭

抗河漢刃披虹霓聲振連巒梯填層谿丁丁登登硤
硤稜稜若兵車之乘凌其響之所應則潰潰漰漰洶
洶薨薨若騫若崩若螭龍之鬪風霆相騰其殊而下
者札嶮梢殺摧碎塊北霞披電裂又似共工觸不周
而天柱折鷓鴣鶴鶴號鳴飛翔羆豸虎兕奔觸讐慄
伏無所入遯無所脫然後斷度收羅梢危顛芟繁柯
乘水潦之波以入於河而流焉盪突肆兀轉騰冒沒
類秦神驅石以梁大海抵曲鱗蹙滙流雷解前者汨
越後者迫隘乃下夫龍門之懸水摺拉頽踏粹首軒
尾瀕入重淵不知其幾百里也濤波之旋滔山觸天

既淳既平彌望悠焉良久乃始昂屹涌溢挺拔而出
林立峰崿穿雲蔽日渙然自撓復就行列渾渾而去
以至其所唯良工之指顧叢臺阿房長樂未央建章
昭陽之隆麗詭特皆是之自出若是何如吳子曰吾
聞君子患無德不患無土患無土不患無人患無人
不患無宮室患無宮室不患材之不已有先王之所
陳四累之下也且虜祁旣成諸侯叛之

先生曰河魚之大上迎濤波壅津涯千里雷馳重馬
輕車遂以君命矢而縱觀焉大罟斷流脩網亘山罩
雷麗罽織紵其間巨舟軒昂仡仡還環水師更呼聲

裂商顏於是鼓譟沓集而從之扼龍吭拔鯨鱗戮白
鼉逐毒螭叱馮夷立水湄搜攪流離掬縮推移梁會
網蹙騰天彌圍掉擗擁躡以登夫歷山之垂如川之
歸如山之崔如雲之披其有乘化會神振拔漣淪摘
奇文出怪鱗騰飛濤而上逸生電雷於龍門者猶仰
綸飛繳頓踏而取之莫不脫角裂翼呀嚇匍匐復就
齧切莫保龍籍具糝五味布列雕俎風雲失勢沮散
遠去若夫魴鱮鮪鯉鯁鱧魴鱖之瑣屑蔑裂者夫固
不足悉數漏脫紘目養之水府而三河之人則已填
溢饜飫腥膏烏鹵聞膾炙之美則掩鼻蹙額賤甚糞

土而莫顧者也若是何如吳子曰一時之觀不足以
夸後世口舌之味不足以利百姓姑欲聞其上者
先生曰猗氏之鹽晉寶之大也人之賴之與穀同化
若神造非人力之功也但至其所則見溝塹畦畹之
交錯輪囷若稼若圃敞兮勻勻渙兮鱗鱗遷瀾紛屬
不知其垠俄然決源醜流交灌互澍若枝若股委屈
延布脉寫膏浸漑濕滑汨彌高掩庫漫壠冒塊決決
沒沒遠近混會抵值堤防嚶瀛沛濺偃然成淵潏然
成川觀之者徒見浩浩之水而莫知其以及神液陰
漉甘鹵密起孕靈富媪不愛其美無聲無形燦結迅

詭廻眸一瞬積雪百里晶晶冪冪奮債離析鍛圭椎
壁眩轉的皪乍似隕星及地明滅相射水裂雹碎龍
從增益大者印纍小者珠剖涌者如坻坳者如缶日
晶熠煜螢駭電走亘步盈車方尺數斗於是哀歛合
集舉而堆之皓皓乎懸圃之巍巍瞰乎滌乎狂山太
白之淋漓駭化變之神奇卒不可推也然後驢羸牛
馬之運西出秦隴南過樊鄧北極燕代東逾周宋家
獲作鹹之利人被六氣之用和鈞兵食以征以貢其
資天下也與海分功可謂有濟矣若是何如吳子曰
魏絳之言曰近寶則公室乃貧豈謂是耶雖然此可

以利民矣而未爲民利也先生曰願聞民利吳子曰
安其常而得所欲服其教而便於已百貨通行而不
知所自來老幼親戚相保而無德之者不苦兵刑不
疾賦力所謂民利民自利者是也

先生曰文公之霸也援秦破楚囊括齊宋曹衛解裂
魯鄭震恐定周於溫奉冊受錫夾輔糾逃以爲侯伯
齊盟踐土低昂玉帛天子恃焉以有諸侯諸侯恃焉
以有其國百姓恃焉以有其妻子而食其力叛者力
取附者仁撫推德義立信讓示必行明所嚮達禁上
一好尚春秋之事公侯大夫策文馬馳軒車出入環

連貫于國都則有五筵之堂九几之室大小定位左
右有秩禽牢餼饋交錯文質饗有嘉樂宴有庭實登
降好賦犧象畢出犒勞贈賄率禮無失六卿理兵大
戎小戎鐘鼓丁寧以討不恭車埒萬乘卒半天下鼓
之則震旆之則畏其號令之動若水之源若輪之旋
莫不如志當此之時咸能驩娛以奉其上故其民至
於今好義而任力此以民力自固假仁義而用天下
其遺風尚有存者若是可以爲民利也乎吳子曰近
之矣然猶未也彼霸者之爲心也引大利以自嚮而
撻他人之力以自爲固而民乃後焉非不知而化不

令而一異乎吾嚮之陳者故曰近之矣猶未也
先生曰三河古帝王之更都焉而平陽堯之所理也
有茅茨采椽土型之度故其人至於今儉嗇有溫恭
克讓之德故其人至於今善讓有師錫僉曰疇咨之
道故其人至於今好謀而深有百獸率舞鳳凰來儀
於變時雍之美故其人至於今和不怒有昌言儆
戒之訓故其人至於今憂思而畏禍有無爲不言垂
衣裳之化故其人至於今恬以愉此堯之遺風也願
以聞於子何如吳子離席而立拱而言曰美矣善矣
其蔑有加矣此固吾之所欲聞也夫儉則人用足而

不淫讓則遵分而進善其道不鬪謀則通於遠而周
於事和則仁之質戒則義之實恬以愉則安而久於
其道也至乎哉今主上方致太平動以堯爲準先生
之言道之奧者若果有貢於上則吾知其易易焉也
舉晉國之風以一諸天下如斯而已矣敬再拜受賜

七稱

袁表

昔枚乘作七發而效者相繼傅崔張曹之倫世所傳
誦心竊慕之然恨其騁奇詭之辭窮廣遠之思轉相
祖襲頗無意義近信陽何景明亦作七述關西趙時

春復作九難誠古人之亞匹也何之病局而不鬯趙之病繁而不精豈子雲所謂麗以淫者乎表吳人也作七稱以夸吳之美設爲秦客以發其端未乃終之以皇業云

秦客有過東吳先生者東吳先生盛稱吳之美客曰吳故蠻夷之國而僻陋之邦也自夫差通於中國暨聲教浸以蕃昌乃後孫吳擅割司馬渡江而聲名文物始盛然蕞爾一隅建國分州者謂之偏安則壤成賦者列之下等烏在其足夸也今先生亟稱焉是猶楚人之詭雲夢而未睹夫洪河之險蜀叟之談劔閣

而不窺夫崑崙之固也竊爲先生不取焉東吳先生哈而歎曰甚矣子之膠於故習而惑於舊聞也夫盈虛消息者皇天之運也變遷流盪者后土之宜也故風氣之開闔有時而禮俗之淳漓靡一賢聖之盛衰有期而世道之升降不常且夫晉冀之地虞夏之所都也而殷周爲墟岐雍之州秦漢之所宅也而唐宋不居何則王霸代興而功業世易固不可局方隅而定論泥典籍以槩觀也今子習故聞舊而訾吳之陋亦何異於拘墟之見窺管之智哉吾將語子以吳之美而子自擇焉客曰唯唯

般關槌橙竹箭則篠簜蒼筤篔簹綠沉鍾龍緣
丘被岡羽毛齒革骨肉之材漁鹽鐵冶錢刀之利江
湖陸海百物攸萃嘉禾碩穀擢穎岐穗麻菽馮戎瓜
瓠綿繫貢賦之饒數倍中古腐紅粟乎海陵登雪粲
於天府爾乃闢廣市啓通廛車接轂士摩肩工輻輳
旅駢闐磊砢充溢貿易譁喧輕紕細縠弱蕉精絺寶
布罽毳卉服織絲純錦綺繒苧蘿縑綺象簞桃笙罽
漆丹朱五方之貨商行賈居揮汗揚塵徼利乘時富
甲乎卓鄭財溢乎猗朱斯物產之淵貨利之丘也客
以爲何如客曰夫投珠抵璧者聖王之烈也贖貨請

環者鄙夫之陋也是惡足稱哉

東吳先生曰闔閭經營夫差締造重城六門複梁周
道準樞極以作宮憲營室而抗館揭姑蘇之崇臺披
長洲之茂苑雙闕軒翥連閣逶迤華殿中央隱隱巍
巍飛薨藻柰井幹璇題洞房曲阿刻楠雕楣圖畫雲
氣勢侔宸居巧運倕爾精竭般輸又乃廣以孫吳衍
以陳隋臨春結綺承露飛廉耀日巨虹望仙通天鏤
以紫沉屑以香檀綴以覆思塗以椒蘭火齊珊瑚瑪
瑙琅玕琥珀菌芝錯落其端卑未央之巖業小阿房
之聯延此亦閎麗之觀軒敞之娛也客以爲何如客

日昔楚敗於章華夏滅於傾宮子之所稱異乎吾所
聞願子更端

東吳先生曰西施間媿十五二八妖冶媠嬋媠可
悅皓齒丹唇髮漆膚雪螭首蛾眉星目桃頰纖穠合
度長短中節桑中濮上之妹阿谷下蔡之女曾未足
以儷其妍媸並其卓絕也於是曳輕裾珮文璫振編
衣披霓裳步閒館游洞房流顧眄耀清揚騰口輔協
宮商奏溱洧之襄詞宣淇沫之艷章彈竽箏理笙簧
謳吳歆詠越吟唱巴郢操鞞任駭午子茂嚴春聲靡
靡音悒悒震人耳盪人心旣乃整華裝以迴旋捷七

盤之妙舞長袖若飄飛髻似舉機疾體輕揮霍閒靡
伎窮陽阿節中激楚縱橫俯仰忽若迅羽已而歌曰
明星爛今夜未央燭煌煌今照華堂樂莫樂今不可
忘復爲歌曰蔓草零兮露朝晞鴈南翔兮秋氣悲人
命促兮我心哀斯亦聲色之至樂歌舞之極歡也客
以爲何如客曰縱耳目之慾者聾瞽之媒也溺燕游
之好者廢痿之根也而子何以稱哉

東吳先生曰專諸之雄要離之桀伍胥之悍梁籍之
烈荆楚之奇材吳會之大俠選風胡之湛盧竦萍燭
之巨闕鍛鍊五金照耀霜雪犀渠鶴膝干將鑄鏤魚

續文選 卷十五
賜扁諸鮫函蛇矛烏號夏服利棘銛鈎隼亾命報怨
讐叱咤則風生喑鳴則電流棲於越入郢丘挫勁曹
劔強劉義勇冠乎萬夫英聲騰乎九州至乃蘭澤春
和叢臯秋厲駕王良之輕鑣馳伯樂之駿騎寧落盧
之勁弓縱繁弱之迅矢挾彈繳於峻陵張置罽於廣
溼走東郭逐韓盧掩蒼兕履玄狐搏乳獬格黠獮殪
屬贖斲鬻擣擒麋麋繫猥狙落鷄鷄攀鳶烏中則雙
加殺不單獲割鮮染輪超距投石飲如川流校若山
積斯亦勇俠之雄馳騁之樂也客以爲何如客曰此
霸王之餘業弋獵之陋觀固未足稱也

東吳先生曰吳之創基肇自泰伯季子守節以讓立
國言公北游禮樂是習遂乃躋洙泗之高第列文學
之哲科變斷髮之龐陋登春臺之熙和家陳俎豆戶
溢絃歌士業振鐸人競操觚彬彬乎郁郁乎買臣嚴
助莊忌之徒已足多矣迨乎三國鼎分六朝虎視俊
茂響臻尤號多士周瑜魯肅之謀略張溫陸績之諷
議步騭諸葛之風雅顧雍呂範之政事虞翻之奇偉
趙咨之機警王謝之勲庸機雲之秀敏唐有敬輿宋
有仲淹咸學貫乎天人材亞乎旦奭功圖乎鼎鍾名
流乎史籍步儒苑以高驤翔藝林而遠集德爲世程

言作士式客以爲何如客曰美則美矣更有進於斯者願先生卒稱之

東吳先生曰胡元俶擾赤縣羶腥中原魚爛大盜瓜分兩儀崩裂三光晦冥高皇帝握靈符麾義旌奮鳳陽據金陵深根固本兼包并吞因揚州之財賦攬江左之豪英總鷹揚之梟將糾哮鬪之勁兵謨謀則劉宋陶李攻討則徐常湯沐翦修鯨於彭蠡殄封豨於涿鹿掃欃槍於滇南驅天狼於漠北混壹乎車書會同乎荒服編髮沮顏焦齒貫胸黥首梟矚文身反踵侏離裸袒之國靡不奔走而臣伏然後蕩滌苛虐

宣布慈仁廣建宗姓登敘賢能制作禮樂刊定章程綱張目密以貽子孫觀其序華夷則義農開闢之功也鋤凶逆則湯武征討之烈也立法制則成周損益之監也颺祖訓則神禹典則之遺也故乃集謳歌騰頌聲薦馨香荷休徵降甘醴耀景星河圖獻洛龜呈獸一角芝九莖駢百祥擾五靈浸潭旁唐匝沓紛綸玉牒不可勝紀彤史不可殫稱蓋自生民以來莫之與京實由起東南以席卷西北資吳會以囊括幽并也故建業舊都豐鎬伊匹億萬斯年配天罔極我吳之美粹難究述聊陳大端以祛子惑客曰鄙人生長

西隣局於見聞敬聆高議請誦終身

七扣

王世貞

齊大夫有疾吳使者造而問之阻於闈曰大夫病謝事乎曰爾大夫病憊乎曰未也何狀曰大夫貌若悴而中腴強飲鮮食口時囁嚅召醫切脉隔陛而語所繇覆藥空噐間稱有瘳使者喜得之色排闥而進揭流蘇颺文幃却息敬問大夫所苦爲齊吏民憂大夫曰敬謝客不敏不慎霜露以辱使者願請燕焉使者曰淄濰之交戎莽穴巢千矢飲羽二矛重喬十聚九

諱番番躑躑其父老息其子弟以日耳目大夫大夫方杜請而寂居游神屺隸之庭解軛縱縮之衢大夫卽百不念治司敗得請其簡書大夫悚爾而聽幾起復臥曰有之不敏之冥蹈於禍也欲迅奮而就飛母若四體之束沈痼也吾子之來藥之乎覲色如剖接辭如切正言以當瞑眩婉旨以徐調節

使者曰唯唯陶衛之區水陸湊瀟前樹安邑之棗後產江陵之橘桑麻竹漆卮茜芋栗谷量牛馬陂計魚鱉車船鱗藪釀池肉坵於是使計然爲之畫策朱公白圭左右僂力握筭桑孔墾利惺國王孫鼓鑄烏倮

畜殖賣漿酒削之微亦足張郅刁奴四游戎王陰易
北則橐駝臄疏馱驥驤紫貂之表表以狝皮緣以
靈璣東則鉛松怪石織文屨絲水碧空青徇徇之合
可以照迷西則瑇瑁赤堊木難火齊馳卵麤麝靈籟
駭犀筒卷白氎指文朱提南則珊瑚扶疎丹砂流離
血玉之蓉耀蛇之璣瑤琨齒貝織筐文機裹蹄琢黃
螭尾呈白連城照乘掩映的歷陸馳水奔晝走夜息
指不及屈室寡畱隙於是乃按府藏怡顏神臞遙羽
膾飛鱗調芍藥寫清醇田池射獵擬薄君人比閭嚮
風貧游趣塵此亦天下之至娛也可以強起大夫乎

大夫曰咈哉予病未能也

使者曰建章之傍甲第闔雄藹然薄霄厥氏金張儋
珪紫庭結襦椒宮據涇跨渭鄠杜旁通湯沐天腴呼
吸帝聰玉柙珠襦題湊黃腸萬歲之夜預賜以從於
是天子獵甘泉祠太乙陪副車從清蹕翽翽飄其當
風禪纒燁以迎日馳擊縹眇聲咳温密若離若合兩
體爲一若明星之麗霄羣臣蓋遙指而彷彿天子乃
大歡樂之萬舞縱橫曼衍魚龍擣織翮炙幽簧鳴飄
雪舞迴風使伯牙鼓琴延涓和歌而觴之歌曰曜靈
兮欲西蘭房兮桂棲子何借兮不歸歛然而起憺然

而悲策昆躡命伏飛穿道北宮直抵昭陽夷施似袖
之流璧列璣行投驍舍人覆射中郎執戟捧杯屏退
徬徨獨承恩而賜佐奉桐酒於匡牀薦靡靡之哀調
出幼眇之秘戲銅龍悵以思合銀虬杳以莫繼頽然
辭別不謝稱醉銀燭列行金貂引馭高春未起冠蓋
填溢門無納指巷絕容騎此亦天下之至貴也可以
強起大夫乎大夫曰咈哉余病未能也

使者曰將以驪山之陽爲壇造天法駕崢嶸降跪推
轂承相奉章御史承旃蹶張威弧鞬鞞戟鋌靜若凝
霜動則急電萬驥聳耳一麾俱先儲胥沈肅菴廬葱

精律按九伐功期不戰則有常鴻師望良臙爲之運
籌授韜絳爲司馬穰苴法曹師曠耳占秦厲舌挑賁
育黜獲綽最諸僚投蘭以嬉負簡示趨虎落長闌龍
驤不囂於是乃縱兵而北填蒲類踐陰山赭焉支血
祁連酋首服匿胡血爆蠡兩賢骨都當戶且渠之屬
泥頸請死渾庾屈射鬲昆薪藜之國解辮而問冠履
攬槍中沒太白遙徙改騎西向則玉門衡闕葱領鮑
蕩渥洼竭產烏孫空帳廻旌東出則沮水方舟右渠
枯骨歲貊砥平三韓稱一揚帆南柁則梅嶺平沈蒼
梧自裂黃屋滄波王頭北闕然後捲甲歿弓歸馬放

牛獻俘廟社班爵通侯此亦天下之至快愉也可以
強起大夫乎大夫曰有是哉如予病何卽不病不能
也

使者曰應侯畏讒乃進剛成文終辭訣平陽被徵明
明元首穆穆股肱八柱承天萬象資生峩冠進賢幡
車陽遂皇皇金章若若綠綬長史導前司直翼毘帝
車起勞百僚屏辟玉食晨分天漿夕傳出入金華尚
羊細旃上應太微拱極開躔艷則千榮就瘁愉則萬
朽回鮮於是乃釗先德躬勞劬握髮吐哺思來庶謨
廣布皇風以蔽九區重譯獻琛王會垂圖五章之鳳

九尾之狐茲白齒耳乘黃鮮踰往往善芳蛩蛩距虛
犬戎吉皇白州比閭百怪瑰偉波若東趨天子乃命
司冊修相績表勲螭龍之鼻首名麒麟之閣施澤迤
邐融光灼爍此亦天下之至偉樂也足以強起大夫
乎大夫曰予病未能也卽不病而以起予胡哉

使者曰赤董之精若耶之英萃爲五彩鬱爲七星純
鉤湛盧揃質易傾含光承影窈眇無形慶卿不講楚
瞳無成於是使風胡薛燭相而拂拭猿公蘭子教以
習擊莊生論說孔周絕迹匿形空岩齋志絕粒七七
之期天女授術銛鋒隱腦詭瑰莫測決虎豹截蛟兕

捷若承蜩易若探蠃若乃五父之衢七嬖之里匿日
爲氛激雷成矢切骨如姬腐心仲子片言卽合投袂
而起透佚重關跬武千里辟影驅神變化若鬼燕謝
變色之夫聶免呼天之姊萬務恒平一畷不冤然後
却祕怪納精玄龍文不化輝山媚川由俠入虛逍遙
長年大夫色動曰劔可鑄乎曰可葛天盧之顛崖巒
厖巖上聳無際甯阬窺巖下矚無底清流潭渺四周
其滙乃以陰陽訢合之夕殿縣茨山而乞其玄液干
將承鑪莫邪韞風凝思太始吸嗑五方其始鎔也瞳
瞳矐矐灑灑瀦瀦鴻彫况今若二有之發矇燁今若太陽

之浴扶桑其始出也冥冥熒熒暈彩韜精杳兮若冲
虛之未形細兮若銀漢之匿微星其始磨也奕葉燁
煌英靈奮張天兮若垂天之白虹又若織阿之耀清
霜其用之也舒卷煥炫崩目逃眴忽兮若大鹵之摧
霰又若豐隆之驅急電未旣大夫曰美矣劔矣神矣
技矣病且起矣恐累二子奈何

使者曰未也以劔入者非玄之玄得地而遺天盍使
廣成授要眇之誨聃史爲之解契素女導內彭翁外
衛出窈入冥調息降嗜日魂月魄立鄴完鄂九還七
返八歸六居坎離旣濟方圓夾扶谷神不歿蔚然靈

株於是北斗除籍天公主進命蒼精兮示符降青鳥
兮馳問駕卿禰之雲旂兮馭房駟以爲駸契貳搖曳
以抗旌兮飛廉挾霞而飄洒度絳河之泓澄兮白榆
歷歷其在下奔星先而扣闈兮蒼龍白虎歛吻爪以
次舍帝句傳於九賓兮賜湯沐而薦之命太娥奏絃
兮玉妃按節而吹參差斟沆瀣之妙漿兮天鷄臙以
爲鵬蒸旃塗之丹卵兮河伯侑以赤髻碧藕千常而
郁郁兮素蓮百子以離離鑿崖崖之玉膏兮汎以苴
勝之靈脂乃醉歌曰天長地久浩無終謬恩列籍托
帝宮私悲逍遙無與同上帝知之賜以格澤一乘粲

女嬋媽靈饌不爽氣醞常醕上下天人嬉遊自然三
光等朗五嶽齊堅此天下之極意蕩志無所肖比者
也大夫可以強起乎大夫曰唯唯否否夫有骨仙也
者有才仙也者有資仙也者骨仙也而流沙有敗道
之錢才仙也而淮南有自殊之安資仙也而沙丘之
肉如鮑膾不佞桎體繼形含濁嗜腥大鈞見限頽陽
就傾雖慕軼妙實病未能

使者曰易奇而法鉤深探賸歸連異名京焦別脉詩
正而葩漸變風雅原騷玉辨賦則楊馬爛蔚虹霞淒
切風雨蘇李五篇枚氏十九唐山鏡吹於何不有尚

續文選 卷十五
書春秋檀考孔嘉腐令育史質辨艷誇先秦瀾瀾西
京峩峩燦則星辰沛爲江河柱下微言漆園導浸沈
洋漫漶宵眇漸滲鷲峰峭崿波演漾精微沈冥萬
細莫狀乃隱詞藪汎義漲咀藝脯洄談釀浮提金壺
之汁太乙青藜之杖離朱心照輸倖意匠混沌啓朗
須彌搖蕩始乎博闕若沈冥之網彌山之罟弋鵬翔
膾鰲樞摘天斗探珊瑚沈而思之兀乎若枯杖之蝸
甲進綸絲於月蝟霏霏忽忽若斷若續若出若沒迨
乎屬辭蒼昊發祥曜靈呈赫雲漢曳練天酒和墨研
霞之帑列行奎壁於是剪蔓刊條探玄極幽堯敘五

始禹疏九流百一其家萬喙寂收巴歛廢音齊野罷
抽衣被窮絃鑑燭累葉咸喬悵天沫政慚怯絳灌辭
勞頗剪羞業趙李輿皂猗倮匄乞振亭亭今獨秀垂
綿綿兮不絕大夫恣然汗流霍然投几曰犬馬未填
溝壑旦暮事此人而有死請畢此死揖讓之間疾病
良已

詔

爲齊文宣西討詔

魏收

朕歷數在躬志清四方蕞爾秦隴久阻風化混一之

續文選 卷一五
事期在今日必當訓旅誓衆天動雲臨朕已下甲汾
流沈船晉地便當躬率將士平陵王壁徑掩長安梟
彼兇首雖藏山沒水終不縱赦朕與梁國舊敦好睦
近聞其奸乃欲規謀宜令上黨王渙總勦熊羆星流
風卷王者之言明如日月宜宣內外咸使聞知

求賢詔

陳宣帝

詔曰舉善從諫在上之明規進賢謁言爲臣之令範
朕以寡德嗣守寶圖雖世襲隆平治非寧一辨方分
職肝食蚤衣傍闕爭臣下無貢士豈余獨運匪薦謹

言置鼓公車罕論得失施石象魏莫陳可否朱雲摧
檻良所不逢禽息觸楹又爲難值至如衣褐以見擔
簦以遊或者艾絕倫或妙年異等黑貂改敝黃金且
殫終其滯淹可爲太息凡厥在位各舉所知試職能
否俟茲黜陟

冊

冊陳王九錫文

徐陵

詔曰大哉乾元資日月以貞觀至哉坤元憑山川以
載物故惟天爲大陟配者欽明惟王建國翌輔者齊

續文選 卷十五 三 希貴堂
聖是以文武之佐礮溪蘊其玉璜堯舜之臣縈河鏤
其金版况乎體得一之鴻姿寧陽九之危厄拯橫流
於碣石撲燎火於崑岑驅馭於韋彭跨蹶於齊晉神
功行而靡用聖道運而無名者乎今將授公典策其
敬聽朕命日者昊天不吊鍾亂於我國家漏網吞舟
強胡內曩茫茫宇宙慄慄黎元方趾圓顛萬不遺一
太清否抗橋山之痛已深大寶迤如平陽之禍相繼
上宰膺運康救兆民鞠旅於滇池之南揚旌於桂嶺
之北懸三光於已墜謚四海於羣飛屠獍偷於中原
斬鯨鯢於蒙汜功滿上國光啓中興此則公之大造

於我皇家者也旣而天未悔禍夷醜荐臻南夏崩騰
西京蕩覆羣胡孔熾藉亂乘間推納藩枝盜假神器
冢司昏撓旁引寇讎旣見貶於桐官方謀危於漢閣
皇運已殆何殊贅旒中國搖然非徒如綫公赫然投
袂匡救本朝復莒齊都平戎王室朕所以還膺寶曆
重履宸居挹建武之風猷彰宣王之雅頌此又公之
再造於皇家者也應務之初登庸惟始三川五嶺莫
不窺臨銀洞珠宮所在寧謐孫盧肇疊越貊爲灾畚
部沾危勢將淪殄公赤旗所指袂疊洞開白羽纒撟
凶徒粉潰非其神武久喪南藩此又公之功也大同

之末邊政不修李賁狂迷竊我交愛敢稱大號驕恣甚於尉他據有連州雄豪熾於梁碩公英暮雅筭電掃風行馳御樓船直跨滄海新昌典徹備履艱難蘇歷嘉寧盡爲京觀三山獠洞八角蠻阨逃矣水寓之鄉悠哉火山之國馬援之所不屆陶璜之所未開莫不懼我王靈爭朝邊候歸睽天府獻狀鴻臚此又公之功也自寇虜清江宮闈幽辱公枕戈嘗膽提劔折心氣涌清霄神飛紫路而番禺連率本自諸夷言得其朋是懷同惡公仗此忠誠乘機勦定執沛令而豐鼓平新野而據鞍此又公之功也世道多艱方隅多

難勦門桀黠作亂衡山兵切池隍衆兼夷獠公以國盜邊境知無不爲卹是同盟誅其醜類莫不魚驚鳥散面縛頭懸南土黔黎重保蘇息此又公之功也長驅嶺嶠夢想京畿緣道首豪遞爲榛梗路養渠率全據大都蓄聚逋逃方謀阻亂百樓不戰雲梯之所未窺萬弩各張高墉之所非敵公龍驤虎步嘯陟風雲山靡堅城野無強陣清妖氛於灑石滅沴氣於雩都此又公之功也遷壬凶慝屯據大臯乞活類馬騰之軍流民多杜弢之衆推鋒轉鬪自北徂南頻歲稽誅實惟勅虜公坐揮三略遙制六奇義勇同心貔貅騁

力雷犇電擊谷靜山空列郡無犬吠之驚藂祠罷狐
鳴之盜此又公之功也王師討虜次屆淪波兵乏兼
儲士有饑色公廻麾彭蠡積穀巴丘億庾之詠斯豐
壺漿之迎是衆軍民轉漕曾無砥柱之難舳艫相望
如運敖倉之府犀渠貝冑顧茂雷霆高檻層樓仰捫
霄漢故使三軍勇銳百戰無前承此軍糧遂殄凶途
此又公之功也若夫英圖邁俗義旅如雲溢壘猜携
用淹戎略公志唯同獎師克在和鵠塞非虞鴻門是
會若晉侯之誓白水如蕭王之推赤心屈禮交盟入
祇感咽故能使舟師金路遠近崩心此又公之功也

姑熟襟要峭函所憑寇虜據其關梁大盜負其扁鑰
公五校裁擣三雄金奮右肉沙潰左廣土崩木甲殪
於中原瓊表赴於江水他他藉藉萬計千群鄂坂之
隘斯開夷庚之道無塞此又公之功也義軍大衆俱
集帝京逆豎凶徒猶屯皇邑若夫表裏山河金湯險
固疏龍首以抗殿剪華岳以爲城雜虜憑焉強兵自
若公廻茲地軸抗此天羅曾不崇朝俾無遺噍軍容
甚穆國政方修物重睹於衣冠民還瞻於禮樂楚人
滿道爭歸於葉公漢老銜恩俱歡於司隸此又公之
功也內難初靜諸侯出關外郡傳烽鮮卑犯塞莫非

沮渠當戶中貴名王冀馬迺於淮南胡笳動於徐北
公舟師步甲亘野橫江殲厥羣羝逐殫封豨莫不絀
木而止戎車靡遺遇濇而旋歸驟盡殪此又公之功
也公克黜禍難劬勞皇室而孫寧之黨翻啓狄心伊
洛之間咸爲虜戍雖金陵佳氣石壘天嚴朝聞戎塵
夜喧鉦鼓公三籌旣畫八陣斯張裁舉靈鉦亦抽金
僕咸俘醜類悉反高墉異李廣之皆誅同龐元之盡
赦此又公之功也任約叛渙梟聲不悛戎羯貪婪狼
心無改穹廬羶幕抵北闕而爲營烏孫天馬指東都
而成陣公左甄右落箕張翼舒掃是攬槍驅其獫狁

長狄之種埋於國門椎髻之酋烹於軍市投秦坑而
盡沸噎渚水而不流此又公之功也一相居中自折
彝鼎五湖小守妄懷同惡公夙駕兼道衣製杖戎玉
斧將揮金鉦且戒袂寇震懼遽請灰釘藝櫬以表其
含弘焚書以安其反側此又公之功也賊龕凶橫陵
虐具區阻兵安忍憑災怙亂自古蟲言鳥跡渾沌洪
荒凡或虔劉未此殘酷公雖宗居汝穎世寓東南育
聖誕賢之鄉含章挺生之地眷言桑梓公私憤切卓
爾英猷承規奉筭戮此大憝如烹小鮮此又公之功
也亂離未久羣盜孔多浙右凶渠連兵構逆豈止千

兵五校白雀黃龍而已哉公以中軍無率選是親賢
奸寇途窮漼然冰泮刑唐之所文命動其天威雷門
之闐勾踐行其嚴戮英規聖跡異代同風此又公之
功也同姓有扈頑凶不賓憑藉宗盟圖危社稷觀兵
滙澤勢震京師威迫蠻夷已爲東帝公論兵於朝堂
之上決勝於樽俎之間寇賈樊滕浮江下瀨一朝翦
撲無待旬師萬里澄清非勞新息此又公之功也豫
章祆寇依憑山澤繕甲完聚多歷歲時結從連橫爰
洎交廣呂嘉旣獲吳淠已擬命我還師征其不恪連
營盡拔僞黨斯擒曜聖武於匡山迴神旗於蠡泝此

又公之功也自八紘九野瓜剖豆分竊帝偷王連州
比縣公武靈已暢文德又宣折簡馳書風猷斯遠至
於蒼蒼浴日杳杳無雷北洎丈夫之鄉南踰女子之
國莫不屈膝拜手請吏欵關此又公之功也京師禍
亂亟積寒暄雙闕低昂九門寥豁寧秦官之可視豈
魯殿之猶存五都簪弁百僚卿士胡服縵纓咸爲戎
俗高冠厚履希復華風宋微子麥稔之歌周大夫黍
離之詠較於斯日未足爲悲矣公求衣昧旦旻食高
春興構官闈具瞻遐邇郊庠宗稷之典六符十等之
章復聞太始之風流重覩永平之遺事此又公之功

也公有濟天下之勲加之以明德成性合道盛德符
天用百姓以爲心隨萬機以成務耻一物非唐虞之
民歸含靈於仁壽之域上德不德無爲以爲夏長春
生顯仁藏用忠信爲寶風雨弗騫仁惠爲基牛羊勿
踐功成治定樂奏咸雲安上治民禮兼文質物色丘
園衣裾里巷朝多君子野無遺賢菽粟同水火之饒
工商富猗頓之旅是以天無蘊寶地有呈祥滴露卿
雲朝團晚映山車澤馬服馭金閑旣昂煥於圖書方
歲蕤於史牒高勲踰於象緯積德冠於嵩華固無得
而稱者矣朕又聞之前王宰世茂賞尊賢式樹藩長

惣征羣伯二南崇絕四履遐曠泱泱東海祚土維齊
巖巖泰山俾侯於魯抑又勤王反鄭夾輔遷周召伯
之命斯隆河陽之禮咸備况復經營宇宙寧唯斷鼇
足之功弘濟蒼生非直鑿龍門之險而酬庸報德寂
爾無聞朕所以垂拱當宁載懷慚悸者也今授公相
國以南豫州之陳畱南丹陽宣城揚州之吳興東陽
新安新寧南徐州之義興江州之鄱陽臨川十郡封
公爲陳公錫茲青土苴以白茅爰定爾邦用建冢社
昔日奭分陝俱爲保師晉鄭諸侯咸作卿士兼其內
外禮實攸宜今命使持節兼司空王通授相國印綬

陳公璽綬使持節兼司空王瑒授陳公茅土金獸符
第一至第五左竹使符第一至第十相國秩踰三鉉
任惣百司位絕朝班禮由事革其以相國總百揆除
錄尚書之號上所假節侍中貂蟬中書監印章中外
都督太傅印綬義興公印策其鎮衛大將軍楊州牧
如故又加公九錫其敬聽後命以公禮爲楨幹律等
銜策四維皆舉八柄有章是用錫公大輅各一玄牡
二駟以公賤寶崇穀疏爵待農室富京坻民知榮辱
是用錫公袞冕之服赤舄副焉以公調理陰陽燮諧
風雅三靈允降萬國和同是用錫公軒縣之樂六佾

之舞以公宣導王猷弘闡風教光景所照鞮象必通
是用錫公朱戶以居以公抑揚清濁褒德進賢髦士
盈朝幽人虛谷是用錫公納陛以登以公嶷然廊廟
爲世鎔範折衝四表臨御八荒是用錫公武賁之士
三百人以公軌茲明罰期在刑厝象恭無赦干紀必
誅是用錫公斧鉞各一以公英猷遠量跨厲嵩溟混
一車書囊括寰宇是用錫公彤弓一彤矢百盧弓十
盧矢千以公天經地義貫徹幽明春露秋霜允供黍
盛是用錫公秬鬯一卣圭瓚副焉陳國置丞相以下
一遵舊式往欽哉其恭循朕命克相皇天弘建邦家

允興洪業以光我高祖之休命

戲爲冊虎文

王世貞

制詔承相白額侯班勇惟乃祖乃父叔皮仲升文武
交暢世濟其美以光有漢君金天降嶽樞星散精少
負雄氣長炳文理帝賚予以右弼使婉於青龍氏彼
不寧乃職以干予之罰君孜孜夙夜秉德陪佐出張
爪牙入幹股肱祈父召叔惟君一人今將奉君之烈
揚於大庭其敬聽予命君昔守宣城黔首飽於芻豢
不克樹義乃改張舊服閭右削跡使君之懿稱定被

遐邇君之功德一也泰山之傍民迫苛政聿來胥宇
君以法刑其三世依依不舍昔華旦秉憲鯨鯨伏誅
夷吾啓封伯氏沒齒君之功德二也梁益之間倮蟲
爲災婁加剪刈道絕行李君之功德三也東海黃公
詭妖挾詐君神武逆折赤刃不行兇渠授首君之功
德四也晉守至忠衷甲粟馬冀逞其欲君挾秘計以
授九尾之校使翼二噓噫滕六降祥逆折厥謀種類
還定君之功德五也復有畸峻單豹盜太乙之寶君
廻照奮威罪人斯得陽貨之誅光於前魯君之功德
六也度索之山鬱壘神荼稟服大教執除妖鬼以借

掃除之役洞幽達遐無所不靡君之功德七也君有
七德功寔配焉章以般般視之眈眈廼又薦啓爾象
賢之魑奔走禦侮九有之內羽毛齒革輻輳闐闐凡
有血氣莫不神明豈惟予一人是效昔尚父非熊在
耄鷹揚繁纓垂露革履彤弓以大表東海世世子孫
咸血食也君之威烈視彼有光而封號不加無以稱
予一人之意今遣御史大夫宋鵠侍中胡紫敬奉冊
冊君爲南山公進號素威上將比於天策扶桑之西
葱嶺之東鴈門之南象郡之北諸非國家湯沐者悉
以充君食邑諸少躡具賜冠邑食有差有司毋得檢

問仍遺君養牛十頭上尊糗餼五日尚方致異味予
有不令之臣曰神羊恃其惠文以陽排觸君悉付之
理君其安意攝精神加飯食以佐予不逮

續文選

卷十五

三十一

希賢堂



